

## lis Gnovis

■ **VIGNESIE.** La curie de cjase comugnâl

Fra i protagoniscj dal confront anuâl inmaneât di chê strade de «Zornade internazionâl de Tière» («Earth Day»; [www.earthday.org/toolkit-earth-day-2021-restore-our-earth/](http://www.earthday.org/toolkit-earth-day-2021-restore-our-earth/)), l'Istitut universitari salesian di Vignesi e di Verone al à volût ancje Michele Candotti, ch'al è intervignût in colegament internet di New York par resonâ su lis cundizions dal mont seont il Programe des Nazions unidis pal svilup «Undp», che l'agronom furlan al è «chief staff». Il confront internazionâl di doi dîs, ai 22 e ai 23 di Avrîl, al jere intitulât «Land's End: per la cura della casa comune» ([www.iusve.it/lands-end](http://www.iusve.it/lands-end)) e al è partît de riflessione comun su la letare encicliche di Pape Francesc «Laudato si». Candotti si è indotorât li de Facoltà di Agrarie de Università Catolice e po si è specializât tal ûs dai terens, in Economie dai Paîs su la strade dal progrès e in Gjestion dai projets di Cooperazion pal svilup. Al à lavorât li dal Centri agrari di Puçui, in Zambia, tal Kenya e pal «Wwf».

■ **ANPEZO.** Dolomitis menaçadis

Lis Dolomitis a periculin di pierdi il ricognosciment di «Patrimoni de Umanità». L'onôr e la responsabilità straordinarie concedûts di «Unesco» a podarissin risultâ no compatibii cul misteriôs Progjet di colegament «Cortina-Arabba» e «Cortina-Alleghe» che une socie di imprenditôrs, guidâts di Mario Mascellari, e smire di fâ jentrâ fra lis oparis programadis pai Zûcs olimpics «Milan-Anpezo» dal 2026. Si cjacare di «Progjet misteriôs» par vie che la «Fondazion Dolomitis Unesco» (dulà ch'è jentre ancje la Region Friûl-V. J., in dite dai Cumons cjargnei e pordenons dal Parc des Dolomitis furlanis) no à vût nissune informazion. Par chel, te vilie de «Zornade de Tière», e je rivade la gnove che la «Comission Ambient» de Cjamarè dai Deputâts e inviarà une schirie di audizions par tamesâ il program di oparis che si progjete di realizâ. Si scrupule che l'investiment al valarès 64 milions. La Region Venet, cul so president Luca Zaia, lu à batiât «fiore all'occhiello del piano di rinascita economica del Bellunese».

■ **PORDENON.** Passion pal ort

Dome Pordenon, fra lis citâts furlanis, al figure te note des primis 30 capitâls di provincie talianis par quantitât di tiere destinade par «Orts urbans». La classifiche le à curade il suplement «Buonenotizie» dal «Corriere della Sera», doprant informazions di «Istat» e di «Coldiretti», riferidis al 2019. Lis cifris de «Agricoltura in citât», a Pordenon, son chestis: 21 mil 830 metris cuadrâts di superficie riservade pai Orts comunitaris e un'incidence dal 0,39% sul total di «Vert urban». Come superficie, la citât plui contadine d'Italie e je Bologne (cun passe 165 mil metris cuadrâts); là che invezeit la citât cu la percentuâl plui alte di Orts comunitaris sul «Vert urban» al risulter Forlì, cul 2,93%.

<b>Miercus 28</b>	S. Valerie m.	<b>Domenie 2</b>	S. Atanasi v.
<b>Joibe 29</b>	S. Catarine di Siene	<b>Lunis 3</b>	Ss. Filip e Jacum ap.
<b>Vinars 30</b>	S. Piu V pape	<b>Martars 4</b>	S. Florean m.
<b>Sabide 1</b>	S. Josef artisan	<b>Il timp</b>	Zornadis ventosis.



**Il soreli**  
Ai 28 al iève aes 5.58  
e al va a mont aes 20.11.



**La lune**  
Ai 3 Ultin cuart.

**Il proverbi**  
Cul cjalt dai bleons  
no si fâs bolli la cite.

**Lis voris dal mès**  
Tratait cun solfar lis vîts e i pomârs,  
che a àn di jessi protezûts dai insets  
che a vegnin fûr dibot cui prins cjalts.

# Ultime clamade pe Italie

*Dentri dai 30 di Avrîl  
a àn di sei pronts  
i «Plans pe riprese»*

Sul Lunari, l'ultime zornade ameteude par che i 27 Paîs europeus a consegnin i «Plans pe riprese e pe resilience» («Pnrr») e reste chê dai 30 di Avrîl. Ma l'Union europeane e à lassât intindi che, par rivâ a spartîsi come cu va i miliarts dal «Next Generation Eu», e contarà plui la cualitât dai Plans che no il rispîet dai calendaris. Salacor par chel, tes ultims setemanis, a son daûr a multiplicâsi lis clamadis, par no che l'Italie e straci un'ocasion, facilmentri, mai plui e mai altri ripetibil. L'apel plui ferbint al à stât batiât «Recovery Planet» e lu àn prontât lis clapis e lis personalitâts – passe mil e 400 – congregadis tal sodalizi «La Società della Cura», che par so sproc al à sielzût: «Fuori dall'economia del profitto». «E je daûr a rivâ une barcje di miliarts – al ribat il document – ma no va viers lis etis dal avignî e nancje viers ce ch'al coventarès par garantî l'avignî dal mont. L'orientament al reste chel de increscite, de concorence e de competizion. Juste il contrari di ce che nus à insegnât la pandemie, al ven a stâi che nissun nol po salvâsi di bessòl». Par inspirâ un percors viers une «societât alternative», la propueste e marche la necessitât de «conversion ecologjiche», de «riappropriazion dai Bens comuns e dai Servizis publics», de «centralitât dai teritoris e de democrazie di prossimitât», di politichis di «pàs, di cooperazion, di biel acet e di solidaritât», di une sience e di une tecnologie pe vite e no pe vuere e di une «finance al servizi de vite e dai dirits» (<https://societadellacura.blogspot.com>). Un'altre schirie di clapis, congregadis tal «Forum talian dal Open



La conversion ecologjiche e je necessarie pe riprese e pe resilience

**Lis propuestis  
de Societât civîl  
par bandonâ  
modei  
economics  
superâts  
e par screâ  
paradigmis  
gnûfs**

Government Partnership», a son intervignudis invidant a rifletî su la necessitât di une «Ripartenza a Porte Aperte». Par contrastâ la coruzion e par garantî une cognossince plene dai dàts ch'a integnin l'emergence pandemiche «al vûl scoltade la dimension civiche»; un Plan «ch'al intint di tornâ a progjetâ l'avignî al scuen tignî cont de spiète, des competencis e de esperience di chei ch'a lotin par difindi il Ben comun» ([www.opengovforum.it](http://www.opengovforum.it)). Ancje la rêt di «Slow Food», tal document ch'al pant la sô «vision», e fevele de «Sfide par un destin comun» ([www.slowfood.it/wp-content/uploads/2021/03/IT\\_visione\\_congresso.pdf](http://www.slowfood.it/wp-content/uploads/2021/03/IT_visione_congresso.pdf)). Il linzûl ch'al taponave l'insostenibilitât, la disavualitât spropositade e l'ecês formidabil ch'al bole il mont al è stât sbregât e duncje il mudament dai paradigmis, seont «Slow Food», cumò al è impreteribil. Ogni Paîs – a sclarissin lis «Comunitâts dal mangiâ bon, net e just par ducj» – al varès di considerâ lis vocazions teritoriâls e ambientâls, lis prerogativis e lis sôs unicitâts culturâls; di rinovâ i assets proprietaris e fiscâi; di garantî la devoluzion di podès viers l'Europe e formis slargadis di autoguvier. La bisugne di preocupâsi ancje dal ambient, te progjetazion di oparis

gnovis, e de menace dai taramots e dal dissest idrogeologic e je marcade tai documents «Manifest pal dibattiment public su lis oparis de transizion ecologjiche», firmât di clapis come «Legambiente», «Acî», «Fridays for future», «Gruppo Abele» e «Libera» ([www.legambiente.it/wp-content/uploads/2021/04/Manifesto-su-Dibattito-pubblico-per-le-opere-della-transizione-ecologica.pdf](http://www.legambiente.it/wp-content/uploads/2021/04/Manifesto-su-Dibattito-pubblico-per-le-opere-della-transizione-ecologica.pdf)), e te domande di un «Plan statâl di prevenzion sismiche tal Recovery Plan», publicât dai sismolics e dai gjeolics talians ([www.salviamoilpaesaggio.it/blog/2021/04/nel-recovery-plan-nazionale-non-ce-un-piano-di-prevenzione-sismica/](http://www.salviamoilpaesaggio.it/blog/2021/04/nel-recovery-plan-nazionale-non-ce-un-piano-di-prevenzione-sismica/)).

Mario Zili

## Messe par furlan

La Messe par furlan e ven cjantade ogni sabide a 5 e mieze sore sere (17.30), li de capele de «Puritât», dapruv dal domo. Sabide al prin di Mai al cjantarà messe pre' Sandro, capelam di Padiâr. Radio Spazio e trasmet sul moment la liturgjie.

## Peraulis in dismentie

par cure di **Mario Martinis**

### ✚ PURCITÂ

v. = macellare il maiale ed acconciare le carni in vari modi (forma denominale del friulano purcit "maiale", che continua il plurale latino porci)  
To barbe al purcite joibe cu ven.  
Tuo zio ammazza il maiale giovedì prossimo.

### ✚ PURNÒ

avv. = eppure, pure (per rafforzare frasi negative o positive) (formato da pûr "pure" e no "no")  
Purnò no ven mai achì, ce displasê.  
Pure non viene mai qui, che dispiacere.

### ✚ PURPÛR

avv. = comunque, eppure, tuttavia (formato da pûr e pûr "pure")  
O sin d'acuardi, purpûr no dal dut.  
Siamo d'accordo, comunque non del tutto.

### ✚ PÛRSÌ

avv. = pure, eppure (per rafforzare frasi negative o positive) (formato da pûr "pure" e sì "sì")  
Pûrsì to barbe al mene a spas il cjan.  
Pure tuo zio porta a passeggio il cane.

### ✚ PUSCRODI

escl. = immaginarsi, figurarsi (formato da pûs "(tu) puoi" e crodi "credere")  
Puscrodi se mi conte alc!  
Figurarsi se mi racconta qualcosa!

### ✚ PUSTOT

s.m. = (terreno) incolto, abbandonato; (terreno) sterile (dallo sloveno pustota "desolazione, deserto; campo non coltivato; podere o fabbricato abbandonato", la voce slava si origina da pust "zona desolata")  
Chest an Bepo al à lassat ducj i cjamps pustots.  
Quest'anno Giuseppe ha lasciato incolti tutti i campi.